

JUT Kipihac wê Jut kivuu ge

¹ A, Jut, Yesu Kilisi nu yuac a, di Jems ge, a lig. A kivuu kipihac ga vô xam wê Anutu tyuc xam di xam timu vô i ge. Mag Anutu xêyaa vin lec xam di Yesu Kilisi viac xam nivihã.

² Anutu i xo vîgwe pîsiv ên xam, di i vông kiyang malehe hixôn xêyaa vin lecên i hivun xam xôn di i yêp dia.

Xomxo kityooên wê vông vevac vô Anutu xolac ge

³ Xam lige, a xo xam vinux yang ên a nêb a ob kivuu kipihac vô xam lec wê Anutu vô il vêl ên il nêd nipaên ge. Lêc gwêbaga a xo ên a nêb a ob kivuu kiyang bangwe i loc vô xam bêga bê xam hêm vông vinên wê xam vông ge xôn pîlihi di vông vevac vô xomxo wê xolac kityooên ge. Anutu vông môp vông vinên lu tîbed vô il wê il tu i nue ge, di ob vông lu ngwe tii vac nang vô il lêm.

⁴ Om a nêb a ob kivuu kiyang lec xomxo kityooên vô xam, ên he ya xôpac mi loc dô vac xam mahîgun. He vô nîmi vô Anutu, di pilepac vizid wê Anutu vông ge lax lec kiyang kityooên ya ên nêb i ngidu môp nipaên wê yêp vac he nilô ge xôn. Di he yax Yesu Kilisi vun. Yesu Kilisi tîbed ge wê tu il nêd xomxo levac di i Apumtau. Mêgem ilage Anutu nêl ên nêb xomxo kityooên tîgee ob tulec myaviwen.

⁵ Om Anutu ob kitya xomxo kityooên tigeê vêl i tiyi xocbê i kitya xomxo Islel wê vông vinên ma ilage vêl ge. Xam xovô pyap ên xam nêbê ilage Apumtau vô he Islel vêl ên vîgwe Isip ði he lop mi la. Lêc timuên he ya o vông i vin lêm, om Anutu kitya he vêl. Xam xovô kiyang tiga pyap îla, lêc a nêb a ob nêl i tii vac vô xam ên xam xovô nang.

⁶ Ilage angela ya sea yuac hixôn lê levac wê Anutu vông vô he gee ði sea Anutu ben. Mêgem Anutu ku he xôn ya sen ði tung he la vac vîgwe mapitoc ta. Om he ob la dô ði i la tyip vô buc levac wê Anutu ob yaxên he nêl kiyang ge.

⁷ Ilage he Sodom yuu Gomola hixôn he vac vîgwe ya wê yêp kwabo vô vîgwe levac yuu ge ninya ge, he êno vông môp nipaên. He vông môp yôdac vêx yuu vux, ði vêx vaci vông yôdac vômá, ði vux vaci vông yôdac vômá. Om Anutu vông myaviwen vô he ði ngwax wê yibên ma ge ya he ma vêl. Anutu hilung kiyang tige yêp seac vô il ên nêb il xê ði il o timu vô môp wê he vông ge lêm.

⁸ Gwêbaga xomxo kityooên wê vông môp nipaên tibêgee, he dô hixôn xam. He yê vîvia bucên lec môp nipaên wê he ninivi xovô ge. He pwoo Apumtau hixôn xomxo kibun ga kiyang vac, ði he yong he vô Anutu nue angela.

⁹ Ilage angela ti lê nêbê Maikel ge yuu Seten ngaênma ên nêbê letya ob kô Moses wê yib ge ninivi. Maikel ge angela levac ti, lêc o yong i vô Seten ði tii i la vêl lêm. Nge, nêl vô Seten ên nêbê, “Apumtau vaci obêc nêl kiyang xêkizêc vô ông.”

¹⁰ Mêlêc xomxo kityooên mô mi nêl kiyang nipaên lec susu wê he o xovô kehe lêm ge, di vông môp wê heche va xovô ge tîyi xocbê bwoc vông môp wê he yê di xovô ge. Om môp nipaên wê he nîlô kidu he nêb he ob vông ge ob kitya he vêl.

¹¹ Anutu obêc vông myaviwen nipaên luu vêl vô he, ên wê he timu vô môp nipaên wê Ken vông ilage, di he vông he nîlô la diluhu vô mone om he timu vô môp wê Belam vông ilage di nêl kiyang kityooên di kô mone lec. Di he yong he di nêl kiyang nipaên lec Anutu tîyi xocbê Kola vông vô Anutu ilage. Om Anutu ob kitya he vêl lec môp tibêgee.

¹² Buc vihati wê xam kituc yaên mi wa i yêp tibed ên wê xam xêmyaa vin lecma ge od xomxo kityooên tibêgee lam kituc lec xam di vông môp nipaên vac xam mahigun. He viac heche va di o ngidu xam xôn lêm. Om he tîyi xocbê susu ningeac wê vông xam kitucmaên vô nipaên ge. Di he tîyi xocbê lun mapitoc, lêc lun valên ma di lea vivêê lam la vêl. Di he tîyi xocbê xax wê ob vuac nôn ge, lêc buc wê ob vuac ge od o vuac nôn lêm. Di he tîyi xocbê xax wê mupac di xomxo pul vêl hixôn ngilôhê ge.

¹³ Xomxo kityooên tigege mi vông môp nipaên wê ob vông ni yoc lec ge lê, lêc he ni o yoc lêm. Om he tîyi xocbê gwec wê vuac mabu mi lam kipyax myasong ningeac la kehe ge. Di he tîyi xocbê pitua wê yal vêl ên lag mi lam di sea ben ge. Mêgem Anutu vông he nêl vîgwe nipaên wê mapitoc ge yêp di he ob la dô vac luta.

Xomxo kityooên ob tulec myaviwen nipaên

¹⁴ Inok ge xomxo vigê vilu di sec yuu wê pum lec Adam ge,* lêc ilage Inok nêl xomxo kityooên tigeê kitong ên nêbê, “Xam ngô lê. Apumtau obêc val hixôn angela wê i vông ge tibeac hiwocên,

¹⁵ ên ob vông myaviwen nipaên vô xomxo nipaên vihati. Di he wê pwoo i kiyang vac di o timu vô lêm gee, di he wê mi nêl kiyang nipaên lec Anutu gee, Anutu ob nêl he nêl nipaên kitong di he ob tulec myaviwen mabu.” Inok nêl bêge ilage lec xomxo kityooên.

¹⁶ Xomxo kityooên tigeê mi nêl kiyang nipaên lec Anutu, di he xêyaa vô myavinê lec môp yuu susu vihati, di he nilô kidu he ên môp nipaên wê yêp vac he nilô ge, di he mi keac vaxvax di yong he lê, di nêl kiyang hizi vô xomxo ên nêb he i vông susu ya vô he.

Xam hôm vông vinên xôn pilihi

¹⁷ Xam lige, xam ngô kiyang wê il lig Apumtau Yesu Kilisi nue sinale nêl vô xam ilage i tii vac nang,

¹⁸ ên he nêl ên he nêbê, “Obêc vô kwabo lec buc timuên myahipu ge od xomxo ya ob yax xolac wê Anutu vông ge vun di ob vô nimi vô Anutu, di he nilô ob la vô môp nipaên wê yêp vac he nilô ge.” Sinale nêl bêge ilage.

¹⁹ Om xomxo nipaên tigeê hibu xomxo vông vinên sea di he mi timu vô môp wê xomxo kibun

* **1:14:** Kiyang wê nêl lec xomxo vigê vilu di sec yuu ge bêga nêbê Adam nu Set, di Set nu Inos, di Inos nu Kenan, di Kenan nu Mahalalel, di Mahalalel nu Jalet, di Jalet nu Inok, om he vigê vilu di sec yuu.

ga vông. Om Myakilôhô Ngibua o dô vac he nilô lêm.

²⁰ Lêc xam lige, xam hôm vông vinên wê Anutu vông vô xam ge xôn xêkizêc ta ên i ngidu xam xôn. Di xam kitaa vô Anutu ya xêkizêc wê Myakilôhô Ngibua vông ge.

²¹ Xam hôm xêyaa vin lecên wê Anutu vông ge xôn pilihi. Di xam dô bin buc wê il lig Apumtau Yesu Kilisi obêc hilung xêyaa vin lecên wê i vông ge lam yêp seac, di ob vông xam la dô mamviha luta lêc luta.

²² Xomxo ya vông nilô la yuu lec vông vinên, om xam xo vigwe pisiv ên he di ngidu he xôn.

²³ He tiyi xocbê he dô vac ngwax nipaên, om xam kô he mi lôm vêl ên ngwax lutibed. Di he ya, xam xo vigwe pisiv ên he, lêc xam xona nê m ên nipaên wê he vông ge, ên môt nipaên wê he vông ge tiyi xocbê ngakwi ningeac wê he vinyum ge, om xam le teva ên môt tibêgee.

Jut pîmil Anutu

²⁴ Anutu vaci tiyi wê obêc viac xam nivîha ên xam o lêc loc vac nipaên lêm. Anutu tiyi wê ob kô xam mi lam le vô i manôn vac xêseac, di nêl vô xam bêga bê nipaên ti o yêp vô xam lêm, mêmegem xam xêm yaa obêc vô nivîha yang.

²⁵ Anutu tibed dô di ici va wê vô il vêl ên il nêd nipaên lec yuac wê il lig Apumtau Yesu Kilisi vông ge. Om il ob hi vixad ên Anutu wê tu il nêd xomxo levac, di i xêkizêc kehe, di il hixôn susu vihati la vac i kwa ngibi. Anutu dô bêge ilage di dô gwêbaga hixôn di obêc dô luta lêc luta. Kiyang nôn.

Yesu Xolac
The New Testament in the Patep Language of Papua
New Guinea
Nupela Testamen long tokples Patep long Niugini
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

PDF generated using Haiola and XeLaTeX on 18 Apr 2025 from source files dated 31 Aug 2023

3d2c844d-4bc8-590b-bbf2-3a5fcd1f7ad8